

痛餘雜錄
星變志
江變紀略

逐鹿記
汰存錄

國初禮賢錄
武宗外紀



江
變
紀
略

徐世溥 著

中
華
書
局

叢書集成初編

痛餘雜錄（及其他六種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：ISBN7-101-00894-1/K·367

此據豫章叢書本
影印初編各叢書
僅有此本

江變紀略

新建 徐世溥 巨源 著

金聲桓左良玉部將也本遼陽衛應襲世職以將材累陞至總兵官隸左後隊左旣敗績襄樊退保武昌力不支則圖屯兵南都癸未春至池州聞其有備而還久之復次武昌張獻忠又日夜東下左帥恐不能不徙欲復趨南京而無名也患之時弘光帝立已半載朝廷昏亂馬士英阮大鍼用事出史可法於揚州而殺北來崇禎先皇太子人滋不服久之都下紛紛言所殺者乃王附

馬子也於眞太子無與東南日夜望眞太子出而立之
乙酉春左密胡以甯因獻計令爲太子手詔趣左帥入
靖留都者使客自北來稱太子有手書血詔付左左佯
受詔爲壇而哭洒血誓師內憚江楚督師侍郎袁繼咸
在九江胡以甯舊與袁游卽遣以甯用太子旨給袁侍
郎會師部署三十六總兵而東以江西屬之末將金聲
桓左至則袁所部呂督師舊將郝効忠郭雲鳳乘袁左
舟宴焚掠九江左兵卽附之良玉見城中火起聞報曰
左兵也卽其舟中頓足嘔血而死左死軍益亂其子夢

庚竟劫袁與俱下至蕪湖弘光帝已執矣繼咸隨弘光
北其中軍總兵官都督鄧林奇死之而左軍三十六將
皆降英王令左夢庚以父官率諸將入朝金聲桓不欲
往乃自請願取江西以獻英王許之卽不遣一滿兵而
以江西專委聲桓還師南向道逢闖將王體忠爲滿兵
所敗追迫卽合營南屯九江聲桓宣言滿兵且夕至馬
步三十餘萬日遣牌諭江西速降卽免屠城一日牌十
四五至巡撫曠昭懼解印而逃諸有司薦紳士民則皆
走江城內外一空六月四日鄉約遂偕市井諸叚賴迎

金督鎮于九江初不知有王體忠也十九日聲桓至乃有諸生十數人迎于江干聲桓戴方巾被青紗金縷酒線蝴蝶披風受諸生庭參於舟前庭參者初見卽跪跪已起揖乃拜復起揖再拜而止聲桓故武人被輕衫驟受文謁以唾手得江西喜殊不自勝左右顧從者當如何答禮且笑且摠引諸生起口中謙讓喃喃有所云而無其辭頰涎墜縮如絲迎者及其從官皆掩口而笑當時聞者知其無足與矣恐有伏兵徘徊久之乃入城體忠忿江城無人迎之入則與金氏分營而居城以東者

爲王城以西者爲金金所分當都會喧聞處官府甲第
萃焉其偏裨第宅又多因得分據華劇網羅鄉城諸富
家誅讎未逃諸豪暴略盡以漸便宜署有司官屬矣陰
念江西迎我特以清兵聲勢而我甲仗士馬精強遜王
氏遠甚體忠亦不大誅掠人心漸有王氏欲計除之未
有以發會八月二十五日薙髮令至實其叔號稱十太
爺者齋文以來令下三日未有應者聲桓曰此王兵爲
梗也明日請體忠計事卽其揖時刺之尸出王兵大擾
攻金氏燒德勝門又燒章江門格鬪三日諸金各率其

精兵巷戰殺傷略相當王氏老營兵私計潰敗無歸且
新去無主卽外據州府勢不能久獨立聲桓謀知其語
且戰且招降而以王氏兵屬體忠舊掌軍鼓號笛者旗
牌王得仁軍中所謂王雜毛也江西自是盡爲金兵矣
聲桓以江西據江南上游西控楚南通福廣得江西則
東南要害居其大半而桓未費滿州一矢斗精孤軍傳
檄取十三府七十二州縣數千里地拱手歸之清朝計
大清入塞以來功未有高於已者意望旦夕封公王次
亦不失侯耳收江疏還乃以副總兵提督江西軍事視

舊官更貶得報氣沮大非所望也是時明唐王已起福
建改元隆武以楊廷麟爲相督師取江西萬元吉爲兵
部尙書督師鎮贛州明年八月隆武敗于汀州十月贛
州破兩督師皆死之諸嘗在閩授官得脫歸者往往有
隆武及閣部諸劄付然見聲桓方恣殺明人士諸凡年
十五以上及有病未薙與告反及誣宦閩者輒殺之非
有故而家貲中百金以上輒誣以通明使有司論殺之
沒其財產十三郡人人莫必其命是以游士莫敢言自
外歸金氏威震閩楚巡撫李鳳翔死聲桓益驕乃大治

宮室以明都司署爲帥府役夫萬餘人窮高極壯避暑之室春白甃屑爲塵堊壁倚者如冰阿閣曲房層檀爲塼覆以絳綈履之若絛嘗病思虎食卽令環西山勒三日得虎而果得虎以脯諸所爲侈縱類是也乃其胷中悲鬱異甚故滅裂極意爲荒暴如此然聲桓爲人陰狼能箝噤不泄方南顧明微內基清盛欲待四方有起者因而自立自李巡撫死北來有司益多挫之王得仁亦望爲提督總兵而不得意同怏怏又屢受折辱得仁本起羣盜從闖營未嘗有堅陣性獷躁不能無惡言或曰

天下事大定矣顧君命當侯否耳富貴自有時君其忍之得仁亦憤則招致方士起宮觀煨金銀以萬金使丹客宗超一開天寶洞將以立壇請致物恠檄罡雷役使丁甲神將爲百勝天符畢法所居故宜春管理王府也深八九重裔優伶教歌兒數十人私居時時戴明制便衣冠于最後堂張飲數令伶人演郭子儀韓世忠故事由此金玉兩家怨辭稍稍聞于外自贛州未破也萬督師嘗遣間使密誘聲桓使反萬從武陵楊樞輔西征時嘗與聲桓相識于左營故也聲桓得書不報間使去乃

遣人捕葛僕菁華械繫于庭夜深解其縛與善飲食勞苦問督師起居殷勤甚厚未明而縱之萬死後菁華亦間泄其語諸歸客閉匿既久慮人操其蹤跡聞已確有間往往各緣所知私覬兩人其始本圖聊免禍耳諸慄競喜事者乃妄意立功名輒時時微言楊萬未死隆武尚在也及餽知兩家怨不得封意則間自露其關防劄付乃言隆武主屢有手詔許公能以江西歸明者卽舉西江封公亦嘗達一二乎未幾江城人士走諸金門下者受意爲聲桓立生祠祠成塑像而請其冠服之式聲

桓令塑爲華陽巾而羽衣昇像入祠觀者強半齟舌而
慄競者益意得初聲桓本故以此探明虛實而歸客亦
因極口詭桓言明復大聚且阿意謂先授侯印令公舉
江西待收京且分天下而王之聲桓日聞此言況陰與
萬督師前語相應不能不喜且信而說者久久亦真自
以爲中興果可指期待也後巡撫章于天至遇諸將益
倨日從諸將索珍寶奇貨呼聲桓曰金副總得仁曰王
把總先此兩人在外固已自稱都督王爲副總以自文
于偏裨矣至是其部伍亦駭一日章巡撫宴布政司堂

鋪旃席地各取銀管吸煙已遞又不及諸將解腰刀割
炙蹄又獨與文官飲食自聲桓而下皆坐旃外酒半嘻
笑顧視曰王得仁汝欲反耶是日得仁歸大愧其從騎
聲桓亦失色俛首鞞鞭還帥府七月得仁提兵如建昌
章于天差官稟追其餉三十萬得仁大怒槌案呼曰我
王流賊也大明崇禎皇帝爲我逼死汝不知耶語汝官
無餉可得扛則有之聲如獅吼目睛皆出敲其差官三
扛曰寄章于天此三十萬餉銀也聲桓聞之謂其客曰
王家兒急矣所遣請印陳大生等數輩皆不還奈何丹

客宗超一弟子黎士彥者亦輕帽喜事舊與左兵往來其鄰胡叟有門人宦隆武者黎從買劄付爲官卽因爲轉賣劄付以災致喜事少年又雅游于金客黃人龍之門聞之卽因人龍自薦于聲桓曰若輩非能得之明兵雖大聚獨我知隆武主所在耳公誠無愛厚費資我以往可期而至也聲桓曰顧汝歸何如而酬汝且功名本共之居有間黎生及胡爾者夜袖兩印入帥府一爲鎮江侯一爲維新伯篆皆柳葉文又玉剛印一上刻小篆文曰精忠報國王亦美甚曰此上所私賜也聲桓喜甚